



**KENYATAAN MEDIA**  
**JABATAN IMIGRESEN MALAYSIA**  
**11 SYAABAN 1439 HIJRAH / 27 APRIL 2018**

---

**IMIGRESEN SERBU PUSAT HIBURAN 'KALUNG BUNGA'**

Jabatan Imigresen Malaysia (JIM) telah menyerbu sebuah pusat hiburan elit di kawasan Solaris Mont Kiara, Wilayah Persekutuan Kuala Lumpur dalam operasi penguatkuasaan yang dijalankan pada jam 3.00 pagi 27 April 2018 yang membabitkan seramai 20 orang Pegawai Imigresen dari Unit Quick Response Team (QRT), Unit Operasi Khas, Bahagian Perisikan Operasi Khas dan Analisa JIM.

Risikan dan pemantauan awal mendapati terdapat aktiviti-aktiviti yang tidak bermoral di dalam premis tersebut dan mempunyai majlis khas bertemakan 'Seksi Thai Kick Boxing' sepertimana yang disambut di negara Thailand.

Semasa serbuan di premis tersebut, wanita warganegara asing dan pekerja pusat hiburan itu cuba melarikan diri dengan menggunakan beberapa laluan rahsia dan juga pintu belakang premis tetapi tindakan tersebut telah digagalkan oleh Pegawai Imigresen yang telah lebih awal mengepung premis tersebut.

Pegawai operasi telah membuat pemeriksaan ke atas **53** orang yang berada di dalam premis dan berjaya menahan seramai **28** orang yang terdiri daripada **21** orang wanita warganegara Thailand dan **7** lelaki warganegara Bangladesh yang mana kesemua mereka disyaki bekerja sebagai penari, penyanyi, pelayan pelanggan (GRO) dan juga pekerja premis itu sendiri.

Terdapat aktiviti 'kalungan bunga' dan persembahan 'cat walk' di atas pentas. Bayaran bagi kalungan bunga bermula dari RM100 hingga RM300 dimana pelanggan akan memberikan sebagai 'tips' kepada perempuan-perempuan yang mereka pilih. Aktiviti ini dijadikan sebagai satu persembahan istimewa di kelab tersebut sebagai daya tarikan pelanggan ke premis itu.

Pusat Hiburan ini pernah diserbu oleh bahagian ini sendiri pada tahun 2017 tetapi premis itu masih lagi menjalankan aktiviti yang sama bagi mengaut keuntungan yang lumayan. Hasil soal siasat awal, wanita - wanita Thailand yang bekerja sebagai GRO boleh mendapatkan 'tips' sehingga RM400 hingga RM500 dalam sehari. Wanita-wanita warganegara Thailand yang bekerja sebagai 'GRO' ini memasuki Malaysia dengan hanya menggunakan Pas Lawatan Sosial bagi tempoh 30 hari dan menjalankan aktiviti-aktiviti sebigini untuk mengaut keuntungan yang lebih dengan dengan mudah.

Pada masa yang sama, pusat hiburan itu juga telah membuat beberapa modifikasi keatas premis itu terhadap pintu magnetik rahsia, laluan rahsia dan juga pintu-pintu keluar yang hanya boleh akses dari dalam premis sahaja bagi menggelakkan dan melambatkan pergerakan pihak penguatkuasa semasa serbuan dilakukan.

Turut ditahan adalah **2** orang lelaki warganegara Malaysia yang disyaki sebagai menyelia aktiviti tidak bermoral kesemua warganegara asing di lokasi kejadian tersebut.

Sebanyak 4 notis untuk hadir member keterangan telah dikeluarkan kepada pekerja, juruwang, pengawal peribadi dan pelanggan yang berada di dalam premis semasa serbuan dijalankan bagi membantu siasatan lanjut.

Antara kesalahan yang dikenalpasti ialah tiada dokumen pengenalan diri, tinggal lebih masa, dan lain-lain kesalahan yang melanggar Akta Imigresen. Kesemua tahanan ini akan ditempatkan di Depot Tahanan Imigresen Bukit Jalil untuk siasatan dan tindakan susulan. Siasatan dilakukan atas pelbagai kesalahan mengikut Akta Permerdagangan Orang dan Anti Penyeludupan Migran (ATISOM), Akta Imigresen 1959/63, Akta Pasport 1966 dan Peraturan-Peraturan Imigresen 1963.

Seperti yang dimaklumkan ini bukan kali pertama premis ini diserbu oleh Penguatkuasa Imigresen. Oleh yang demikian, JIM sekali lagi menggesa semua pihak berkuasa terutamanya Pihak Berkuasa Tempatan (PBT) supaya bersama-sama mengambil tindakan yang tegas terhadap premis-premis yang menjalankan aktiviti tidak berlesen serta aktiviti tidak bermoral supaya rangkaian kesalahan dapat diputuskan. Ini penting bagi memastikan aktiviti yang melanggar undang-undang ini tidak terus dijalankan walaupun telah diserbu pihak berkuasa berkali-kali.

JIM mengingatkan orang ramai dan majikan supaya tidak melindungi PATI atau terpaksa berhadapan dengan tindakan undang-undang. Orang ramai yang mempunyai maklumat tentang PATI atau sebarang maklumat yang boleh membantu JIM dalam melaksanakan penguatkuasaan supaya tampil menyalurkan maklumat tersebut. JIM akan mengambil tindakan drastik untuk menutup ruang dan peluang berlakunya aktiviti tidak bermoral.

#TAMAT#

**DATO' SERI HAJI MUSTAFAR BIN HAJI ALI**  
**KETUA PENGARAH IMIGRESEN**  
**MALAYSIA**